



**SA BOERPERD  
TELESGENOOTSKAP / BREEDERS' SOCIETY**  
*The Ideal Sporting and Pleasure Horse*

## GRONDWET

Wysigings:

6 April 2001; AJV, 30 Mei 2003; AJV, 1 April 2005; AJV, 6 April 2006; AJV, 13 April 2007; AJV, 2 Mei 2008; AJV, 2 Oktober 2009; AJV, 30 September 2010; AJV, 21 November 2014; AJV, 16 September 2017

### INHOUD

	WOORD OMSKRYWING
<b>1</b>	NAAM VAN DIE GENOOTSKAP
<b>2</b>	DOELSTELLINGS
<b>3</b>	MAGTE VAN DIE GENOOTSKAP
<b>4</b>	LIDMAATSKAP
<b>5</b>	REGISTER VAN LEDE
<b>6</b>	REGTE VAN LEDE
<b>7</b>	LEDEGELD & LEDE
<b>8</b>	BEDANKINGS, SKORSING & OPHEFFING VAN STEMREG VAN LEDE
<b>9</b>	HERAANSLUITING VAN LEDE
<b>10</b>	VERKIESING VAN DIE RAAD & UITVOERENDE KOMITEE
<b>11</b>	MAGTE & PLIGTE VAN DIE RAAD
<b>12</b>	VERGADERINGS
<b>13</b>	NOTULES NA VERGADERINGS
<b>14</b>	FINANSIËLE BEPALINGS
<b>15</b>	LIDMAAT VAN DIE VERENIGING & AFFILIASIE
<b>16</b>	VERKIESING VAN VERTEENWOORDIGERS TOT DIE AJV VAN DIE VERENIGING
<b>17</b>	GRONDWETLIKE WYSIGINGS
<b>18</b>	KANTOOR VAN DIE GENOOTSKAP
<b>19</b>	OUTENTIEKE LESING VAN HIERDIE GRONDWET



<b>WOORD</b>	<b>OMSKRYWING</b>
<b>AANTEKENING</b>	Die prosedure van aantekening in die Basiese Register van die Kuddeboek;
<b>DEPARTEMENT</b>	Die Departement of Departemente gemoeid met die administrasie van die Wet;
<b>DIER</b>	’n SA Boerperd wat in die Kuddeboek aangeteken of geregistreer is of daarvoor geskik is, en die woorde “Hings/te”, Merrie/s”, Perd/e” en “Vul/lens” sal dieselfde betekenis hê;
<b>EIENAAR VAN 'N DIER</b>	Die persoon wie (a) (volgens die rekords van die Vereniging) sodanige dier besit, of (b) tot bevrediging van die Raad bewys lewer dat sodanige dier geskik is om in sy naam aangeteken of geregistreer te word;
<b>EISEL</b>	’n Eisel van ’n dier en sluit ook ’n embrio in;
<b>EMBRIO</b>	’n Bevrugte eisel van ’n dier;
<b>GEBIED</b>	Suid-Afrika en sodanige ander lande soos van tyd tot tyd deur die Genootskap met die goedkeuring van die Vereniging bepaal
<b>GEBOORTE</b>	Die geboorte van ’n dier;
<b>GENOOTSKAP</b>	SA Boerperd Telersgenootskap
<b>GRONDWET</b>	Die grondwet (uitgesluit die Verordeninge van die Genootskap),
<b>INSPEKTEUR</b>	’n Persoon in die hoedanigheid as inspekteur deur die Raad aangestel;
<b>KOPER</b>	Die persoon of persone aan wie eienaarskap of gesamentlike eienaarskap van ’n dier oorgedra word deur die verkoper van sodanige dier;
<b>KUDDEBOEK</b>	Die Kuddeboek van die Genootskap waarin die besonderhede van alle diere ingeskryf word;
<b>MINISTER</b>	Die Minister van die betrokke Departement;
<b>RAAD</b>	Die Raad van die Genootskap;
<b>RAS</b>	Die SA Boerperdras;
<b>REGISTRATEUR</b>	Die beamppte ingevolge die Wet aangewys as Registrateur van Veeverbetering;
<b>REGISTREER</b>	Die prosedure van registrasie van diere deur die Vereniging in die Volgeregistreeerde en Hulpstamboekafdelings van die Kuddeboek, of waardeur ’nvoorvoegsel deur die Vereniging op rekord geplaas word;
<b>SEKRETARIS</b>	Die Sekretaris van die Genootskap;
<b>SEMEN</b>	Die semen (saad) van ’n dier,
<b>SUID-AFRIKAANS GETEELDE DIER</b>	(vir doeleindes van aantekening of registrasie), ’n dier wat in of onderweg na Suid-Afrika gebore is: Met dien verstande dat ’n dier wat gebore word as gevolg van ’n ingevoerde eisel, as ’n ingevoerde dier beskou word;
<b>TELER VAN 'N DIER</b>	Die eienaar van: (a) die moeder ten tyde van die geboorte van ’n dier, (b) sodanige dier tydens aansoek om aantekening of registrasie in die Kuddeboek, (c) die draermerrie van sodanige embrio ten tyde van die geboorte van ’n vul as gevolg van ’n embrio oorplasing;
<b>VERENIGING</b>	Die Suid-Afrikaanse Stamboek-en Diereverbeteringsvereniging;
<b>VERKOPER</b>	Die persoon of persone wie die eienaar/gesamentlike eienaars van ’n dier is volgens die rekords van die Vereniging, of in die geval van ’n ingevoerde dier, die eienaar in die land van herkoms, wie sodanige dier verkoop het;
<b>VULBOEK</b>	Die Vulboek van die Genootskap waarin die besonderhede van alle SA Boerperdvullens aangeteken word ten opsigte waarvan geboortekennisgewings ingedien was; en
<b>WET</b>	Die Veeverbeteringswet, 1977 (Wet No. 25 van 1977), insluitende die regulasies uitgevaardig ingevolge daarvan.  Ander woorde, afkortings en terme gebruik in die Grondwet, wat nie hierbo omskryf is nie, en waarvan ’n bepaalde betekenis geheg word in die Wet, sal dieselfde beteken as in die Wet.  Tensy ’n teenstrydige bedoeling duidelik uit die verband blyk, sal alle woorde wat in die Grondwet na persone in die manlike geslag verwys, die vroulike geslag insluit en woorde in die enkelvoud, sal die meervoud insluit en woorde in die meervoud, sal die enkelvoud insluit.

# **GRONDWET**

## **1. NAAM VAN DIE GENOOTSKAP**

Die naam van die Genootskap is die SA Boerperd Telersgenootskap.

## **2. DOELSTELLINGS**

Onderhewig aan die bepalings van die Wet en hierdie Grondwet is die doelstellings en magte van die Genootskap om:

- (a) die teelt en verbetering van die ras aan te moedig in die Gebied deur uitvoering te gee aan die magte en pligte verleen aan die Genootskap ingevolge die Wet ten opsigte van aantekening of registrasie van stambome by die Vereniging, invoer en uitvoer van diere, semen en eiselle, tegniese adviserende- en inspeksiedienste of op enige ander wyse;
- (b) die rasegtheid van diere in die Gebied te bewaar en om deur alle moontlike en beskikbare middele belangstelling in die ras te bevorder;
- (c) noukeurige verslae van die stambome en besonderhede van diere saam te stel, te bewaar en in stand te hou of te laat saamstel, bewaar en instandhou, met die doel vir aantekening of registrasie deur die Vereniging;
- (d) 'n "Standaard van Voortreflikheid" vir die ras op te stel;
- (e) vir tentoonstellingsdoeleindes verskillende klasse vir die ras te verkry en beoordelaars te benoem wat bevoeg word om die ras te beoordeel; om landbougenootskappe en andere te oortuig van die wenslikheid en noodsaaklikheid daarvan om slegs beoordelaars aan te stel wat deur die Genootskap aanbeveel word;
- (f) die verkoop van diere te bevorder;
- (g) deur samewerking met die Vereniging en die Departement, voorligting te gee om die ras te verbeter;
- (h) in die algemeen alles in sy vermoë te doen ter bevordering van sy lede se belange met betrekking tot hul bedrywighede in verband met die ras; en
- (i) inligting in te win en te versprei aangaande die beste wyse waarop die teling van die ras die beste uitgevoer en op die voordeligste manier uitgebou en voortgesit kan word en lede op hoogte te hou met wetenskaplike- en ander ontwikkeling.
- (j) \_\_\_\_\_ 'n maatskappy met 'n nie-winsgewende oogmerk op te rig om die doelstellings soos in die Grondwet van die Genootskap vervat, tot uitvoer te bring en te bevorder. Die opgesomde doelstelling soos in die Memorandum van Inkorporasie opgeneem, sal al die doelstellings (a tot j) soos in die Grondwet van die Genootskap vervat, insluit.

## **3. MAGTE VAN DIE GENOOTSKAP**

Onderhewig aan die bepalings van die Grondwet sal die Genootskap die mag hê om:

- (a) sodanige funksies te vervul en pligte uit te voer soos deur die Wet neergelê asook kragtens sy lidmaatskap van die Vereniging en die verlening van regs persoonlikheid aan die Genootskap in terme van die Wet; en
- (b) in die algemeen stappe te neem soortgelyk aan dié wat 'n regspersoon by wetgewing kan verrig ten einde sy doelstellings te bereik.

## **4. LIDMAATSKAP**

### **4.1 VERKIESBAARHEID**

Lidmaatskap van die Genootskap sal beperk word tot persone bo die ouderdom van 18 jaar.



## 4.2 INDELING VAN LIDMAATSKAP

Lidmaatskap sal uit lede soos hieronder beskyf, bestaan

### 4.2.1 Gewone lede

Persone wat in Suid-Afrika woon en wat direk of indirek by die teelt van SA Boerperde betrokke is, kan vir lidmaatskap van die Genootskap as Gewone lede in aanmerking kom. Vir die doeleindes van hierdie subklousule word 'nmaatskappy, private maatskappy, vennootskap of regspersoon beskou as 'n persoon en kan as sodanig vir Gewone Lidmaatskap van die Genootskap in aanmerking kom.

Persone wat aktiewe telers van SA Boerperde is en sodanige diere ooreenkomstig hierdie Grondwet aanteken of registreer, sal as Aktiewe Gewone Lede bekend staan. Sodanige Aktiewe Lede sal al die regte en voorregte van lidmaatskap geniet en sal ook tot die Raad verkiesbaar wees. Stemreg vir hierdie lede by alle vergaderings is as volg:

- (a) Aktiewe Gewone Lede met 0 – 10 geregistreerde diere het een (1) stem.
- (b) Aktiewe Gewone Lede met 11 of meer geregistreerde diere het twee (2) stemme.
- (c) 'n Aktiewe Gewone Lid van die Genootskap, wat meer as 10 (tien) geregistreerde teeldiere besit, kwalifiseer as teler en kry 'n addisionele stem op die Algemene Jaarvergadering van die Genootskap.

Alle ander lede sal as Nie-Aktiewe Gewone Lede bekend staan. Sodanige Nie- Aktiewe Lede sal al die regte en voorregte van lidmaatskap geniet, insluitende stemreg by enige vergadering van die Genootskap en sal ook tot die Raad verkiesbaar wees.

### 4.2.2 Lewenslange-erelede

Vir spesiale dienste gelewer in belang van die ras mag die Algemene Jaarvergadering 'n persoon tot Lewenslange-erelid verkies, op voorwaarde dat dit op aanbeveling van die Raad geskied. Sodanige Lewenslange-erelid sal al die regte en voorregte van lidmaatskap geniet, insluitende stemreg by enige vergadering van die Genootskap en sal ook tot die Raad verkiesbaar wees.

### 4.2.3 Spesiale Erelide

Persone wie nie noodwendig aktief gemoeid is met die teelt van die ras nie, mag deur die Raad verkies word tot Spesiale Erelid op sodanige voorwaardes soos deur die Raad bepaal mag word. 'n Spesiale Erelid sal geen stemreg by die vergaderings van die Genootskap hê nie en ook nie tot die Raad verkiesbaar wees nie.

### 4.2.4 Buitelandse Lede

Enige persoon met inbegrip van 'n maatskappy, private maatskappy, vennootskap of regspersoon woonagtig in die Gebied buite Suid-Afrika wat belangstelling toon in die teel van diere en wie direk of indirek gemoeid is met die teel van diere, sal in aanmerking kom vir aanvaarding as 'n Buitelandse Lid. Uitgesonderd die reg om:

- (a) op 'n algemene vergadering te stem, en
- (b) om tot die Raad verkies te word,

sal al die regte, voorregte en verpligtinge van lede *mutatis mutandis* van toepassing wees op alle lede wie aansoek doen om by die Genootskap geregistreer te word of wie reeds by die Genootskap as Buitelandse Lede geregistreer is. Buitelandse Lede is *ipso facto* aanspreeklik vir koste aan die Vereniging.

### 4.2.5 Ere Vice-President

Vir spesiale dienste gelewer in belang van die ras mag die Algemene Jaarvergadering 'n persoon tot Ere Vice-President verkies: Op voorwaarde dat dit op aanbeveling van die Raad geskied. Sodanige Ere Vice-President sal al die regte en voorregte van lidmaatskap geniet, insluitende stemreg by enige vergadering van die Genootskap waarop hy ex officio sitting het. Daar sal nie gelyktydig meer as 3 (drie) Ere Vice-Presidente wees nie. So 'n persoon word vrygestel van ledegeld.



#### 4.2.6 Skoulidmaatskap

Enige persoon of regs persoon wat belangstel in die SA Boerperd ras, mag as Skoulid aansluit teen 'n jaarlikse fooi soos deur die raad van tyd tot tyd bepaal sal word. Skoulidmaatskap van die genootskap laat hierdie lede toe om aan enige skou, gedurende die lidmaatskap jaar, wat aangebied word onder die beskerming van die Genootskap, deel te neem, asook om literatuur, kennisgewings en nuusbriewe van die genootskap te ontvang.

'n SKOU LID sal nie:

- (a) stemreg hê op 'n vergadering van die Genootskap nie;
- (b) verkiesbaar wees tot die Raad nie;
- (c) geen ANDER voorregte ONTVANG nie, behalwe dat so 'n lid die reg sal hê (soos ander lede) om aan enige skoue wat onder beskerming van die SA Boerperd Telersgenootskap plaasvind, te kan deelneem.

#### 4.3 MAATSKAPPY, PRIVATE MAATSKAPPY, VENNOOTSKAP OF REGSPERSOON

4.3.1 'n Maatskappy, private maatskappy, vennootskap of regs persoon wat om Gewone Lidmaatskap aansoek doen, moet aan die Genootskap sodanige feite en gegewens voorlê as wat nodig mag wees om die aard van die beheerende aandeel daarin te bepaal en moet dan, of te eniger tyd daarna, benewens die vereiste gegewens wat van alle aansoekers verlang word, die Genootskap verder in kennis stel van die naam en adres van die persoon wat aangestel is om as verteenwoordiger by vergaderings van die Genootskap op te tree.

Lg. vind plaas op die verdere voorwaarde dat sodanige persoon die reg sal hê om skriftelik 'n plaasvervanger te benoem. Sodanige skriftelike benoeming moet die Genootskap nie later as voor die aanvang van die vergadering waarop sodanige plaasvervanger moet stem, bereik nie.

Ten opsigte van 'n vennootskap moet die volle name en adresse van alle vennote ten tyde van aansoek om lidmaatskap aan die Genootskap verstrekkend word en sulke vennote sal gesamentlik en afsonderlik vir alle verpligtinge teenoor die Genootskap verantwoordelik wees.

4.3.2 Alle stukke wat aan sodanige gevolmagtigde verteenwoordiger, soos in Klousule 4.3.1 uiteengesit, gerig is, word beskou as behoorlik op die maatskappy, private maatskappy, vennootskap of regs persoon bestel te wees en by alle vergaderings wat deur sodanige gevolmagtigde verteenwoordiger namens die maatskappy, private maatskappy, vennootskap of regs persoon bygewoon word, word die maatskappy, private maatskappy, vennootskap of regs persoon beskou as behoorlik verteenwoordig te wees.

4.3.3 Die persoon wat, soos in Klousule 4.3.1 uiteengesit, aangewys is om sodanige maatskappy, private maatskappy, vennootskap of regs persoon te verteenwoordig, mag tot die Raad verkies word.

4.3.4 Indien so 'n maatskappy, private maatskappy, vennootskap of regs persoon in gebreke bly om aan die vereistes van Gewone Lidmaatskap te voldoen, soos in Klousule 4.2 uiteengesit, sal sy lidmaatskap van die Genootskap beëindig word en die bepalinge van die volgende Klousule 4.3.5 sal *mutatis mutandis* op so 'n maatskappy, private maatskappy, vennootskap of regs persoon van toepassing wees.

4.3.5 In die geval van die likwidasië van 'n maatskappy of private maatskappy of die ontbinding van 'n vennootskap of regs persoon, sal lidmaatskap van die Genootskap outomaties beëindig word: Met dien verstande dat:

- (a) alle gelde of bedrae aan die Genootskap verskuldig op die datum van likwidasië of ontbinding deur die Genootskap van die likwidateur van sodanige maatskappy of private maatskappy of van die lede (hetsy gesamentlik of afsonderlik) van sodanige vennootskap of regs persoon gevorder sal word;
- (b) die likwidateur van sodanige maatskappy of private maatskappy en die lede van sodanige vennootskap of regs persoon verplig sal wees om al die verpligtinge van so 'n maatskappy, private maatskappy, vennootskap of regs persoon na te kom ten opsigte van

- aantekeninge, registrasies, oordragte of enige verpligtinge wat die maatskappy, private maatskappy, vennootskap of regs persoon as lid van die Genootskap moes nakom; en
- (c) enige gelde wat betaalbaar mag wees, soos kuddegelde, aantekeninge, registrasies, oordragte of ander verpligtinge wat na so 'n outomatiese beëindiging van lidmaatskap nagekom moet word, ooreenkomstig die skaal vir Gewone Lede of Lewenslange Lede opgelê sal word.

#### **4.4 Aansoek om Lidmaatskap**

- 4.4.1 Aansoek om lidmaatskap van die Genootskap moet op die voorgeskrewe vorm (Bylae A3 of A4) aan die Genootskap gerig word. Die aansoek moet ook vergesel gaan van die betrokke subskripsie en/of intreegeld soos uiteengesit in die Bylae A1 van Gelde van die Genootskap.
- 4.4.2 'n Aansoek om lidmaatskap moet vergesel gaan van die nodige bewys dat aan die bepaalde vereistes beantwoord word.
- 4.4.3 Die Raad mag die aansoek om lidmaatskap van enige persoon aanvaar, hetsy onvoorwaardelik of op sodanige voorwaardes as wat die Raad mag bepaal, of enige aansoek weier: Met dien verstande dat redes vir sodanige weiering verstrek sal word.
- 4.4.4 Indien 'n aansoek om lidmaatskap geweier is, sal die aansoeker geregtig wees op die terugbetaling van enige gelde wat sy aansoek vergesel het.

### **5. REGISTER VAN LEDE**

- 5.1 Die Genootskap sal 'n register van alle lede hou waarin die datum van toelating tot lidmaatskap, hul posadres, bedrae van hul ontvang en die datum van betaling, agterstallige gelde, indien enige, wat verskuldig mag wees, asook die datum waarop die laaste diere in hul naam aangeteken of geregistreer is, ingeskryf moet word.
- 5.2 Elke lid moet die Genootskap skriftelik binne een maand van 'n verandering van sy posadres in kennis stel en alle kennisgewings of publikasies wat aan 'n lid se aangetekende adres gestuur is, sal beskou word as behoorlik op sodanige lid bestel te wees.
- 5.3 Alle korrespondensie en kennisgewings wat deur die genootskap aan lede versend word, hetsy elektronies, per epos, sms, plasing daarvan op die webblad, of enige ander billike kommunikasie middel deur die Raad aanvaar, sal as 'n geldige kommunikasie medium gesien word en sal dus as bindend beskou word.
- 5.4 Dit is die verantwoordelikheid van alle lede om toegang tot elektroniese kommunikasie te verseker.

### **6. REGTE EN VOORREGTE VAN LEDE**

Uitgesluit eksekuteurs van afgestorwe boedels, kurators van insolvente boedels en likwidateurs van maatskappye of private maatskappye sal die regte en voorregte van elke lid van die Genootskap persoonlik op homself van toepassing wees en dit is nie oordraagbaar nie, hetsy deur sy eie handeling of deur enige wetsbepaling.

Regte van lede sal, onderworpe aan die voorskriftelike bepalinge van Klousules 4 en 8.3, die volgende insluit:

- (a) om alle verslae en ander publikasies te ontvang wat deur die Genootskap vir verspreiding onder lede uitgegee word;
- (b) om alle algemene vergaderings van die Genootskap by te woon en om op sodanige vergaderings te stem;
- (c) om aansoek te doen om die aantekening en registrasie van diere in ooreenstemming met die bepalinge van die Grondwet;

- (d) om, indien beskikbaar, alle deskundige tegniese advies met betrekking tot aangeleenthede rakende die ras van die Genootskap se inspekteurs en amptenare te ontvang. Alle koste wat hieraan verbonde mag wees moet deur die aansoeker betaal word;
- (e) om die Genootskap se amptelike verslae te raadpleeg en te gebruik;
- (f) om oor al die regte en voorregte en verpligtinge soos in die Grondwet uiteengesit, te beskik; en
- (g) om jaarlikse inspeksiedienste van keurders te ontvang, indien verlang en indien omstandighede dit toelaat. Alle koste hieraan verbonde moet deur die aansoeker betaal word.

## **7. LEDEGELD EN GELDE**

- 7.1 Alle ledegelde of enige ander gelde en kommissie aan die Genootskap betaalbaar, word van tyd tot tyd deur die Raad bepaal en word vir kennisname op die eerste daaropvolgende algemene vergadering van die Genootskap voorgelê. Geen finansiële state sal op enige openbare platform gepubliseer word nie.
- 7.2 Die jaarlikse ledegelde is vooruitbetaalbaar op 1 April van elke jaar en sal as agterstallig beskou word as dit nog nie op 30 Junie van dieselfde jaar betaal is nie.
- 7.3 Enige lid
  - (a) wie se ledegeld agterstallig is; of
  - (b) wat ander gelde en kommissie aan die Genootskap skuld ten opsigte van enige gelde of verpligtinge vir meer as 30 dae nadat 'n eis om die betaling daarvan deur die Sekretaris aan hom gerig is, sal daarna geen regte en voorregte van lidmaatskap geniet voordat sodanige skulde aangesuiwer is nie.
- 7.4 Die Raad mag opdrag gee dat rente en/of boetes gehef word op alle agterstallige rekeninge teen 'n koers soos van tyd tot tyd deur die Raad bepaal mag word.
- 7.5 Enige lid wie, om watter rede ookal, ophou om 'n lid van die Genootskap te wees sal aanspreeklik bly vir alle bedrae wat ten tyde van die beëindiging van sy lidmaatskap deur hom aan die Genootskap verskuldig was.
- 7.6 Indien die Raad sou beslis dat die rekening van 'n lid agterstallig is of ten tyde van die beëindiging van sy lidmaatskap uitstaande is, sal so 'n lid, indien sy rekening vir invordering aan 'n firma van prokureurs oorhandig word, verantwoordelik gehou word vir die betaling van alle regskoste, invorderingsgelde, prokureursgelde en kliëntkoste wat dit mag meebring, tesame met die oorspronklike bedrag, boetes en eise wat deur hom aan die Genootskap verskuldig is.

## **8. BEDANKINGS, SKORSING EN OPHEFFING VAN STEMREG VAN LEDE**

### **8.1 BEDANKING VAN LEDE**

Enige lid mag bedank as lid van die Genootskap deur skriftelik kennis daarvan aan die Genootskap te gee, met dien verstande dat:

- (a) sodanige bedanking nie in werking sal tree voor die einde van die finansiële jaar waarin die bedanking ingedien is nie;
- (b) geen ledegelde of gedeelte daarvan terugbetaalbaar sal wees nie; en
- (c) alle gelde aan die Genootskap verskuldig ten volle betaal is en die lid sy verpligtinge nagekom het ten opsigte van dokumente, rekords, aantekeninge, registrasies en oordragte of enige ander verpligting met betrekking tot sy lidmaatskap deur die Genootskap vereis.

## **8.2 SKORSING VAN LEDE**

8.2.1 Die Raad mag 'n lid skors wat:

- (a) in gebreke gebly het om enige bedrag wat deur hom aan die Genootskap verskuldig is te betaal binne 60 dae nadat 'n skriftelike eis vir sodanige vereffening deur die Sekretaris onderteken, aan hom gepos is;
- (b) die Grondwet of enige reël van die Genootskap oortree het of wat na oordeel van die Raad op enige wyse oneerbaar of afbrekend teenoor die karakter, of ten nadele van die belange van die Genootskap opgetree het;
- (c) deur sy optrede of gebrek daaraan werklike of moontlike oneer aan die Genootskap gebring het of wat skuldig was aan gedrag ten werklike of moontlike nadeel van die doelstelling van die Genootskap;
- (d) met opset of vir persoonlike gewin of voordeel foutiewe informasie aan die Genootskap of enige van sy amptenare of aan beampptes of beoordelaars by skoue verstrekket het, of wat aan die liggaam van 'n dier sodanige veranderings aangebring het om enige persoon te mislei;
- (e) probeer om 'n amptenaar van die Genootskap om te koop; of
- (f) skuldig bevind is op grond van 'n oortreding van die Wet;

MET DIEN VERSTANDE DAT geen stappe vir skorsing geneem sal word teen 'n lid van die Genootskap nie, alvorens die Genootskap nie minstens 30 dae voor die datum van die Raadsvergadering waarop sodanige skorsing behandel sal word, 'n geregistreerde brief aan so 'n lid gerig het waarin hy in kennis gestel word van sy voorgestelde skorsing en waarin daar 'n beroep op hom gedoen word om persoonlik, of indien hy so verkies, deur sy behoorlik gemagtigde verteenwoordiger, sy kant van die saak op die Raadsvergadering te stel.

8.2.2 Die Raad of enige Komitee van die Raad sal geregtig wees om behoorlik navraag te doen in verband met die gedrag van 'n lid en om sodanige informasie by so 'n plek, persoon, firma en/of instansie in ontvangs te neem en daarop te handel op so 'n wyse as wat die Raad mag goeddink.

Die gewone reëls wat betref die lewering van getuienis sal nie van toepassing wees op sodanige bona fide navraag nie en geen lid sal enige aksie, eis en/of reg van verhaal teen die Raad of sy Komitee hê in verband met enige aangeleentheid en/of saak wat voortspruit uit sodanige navraag of informasie wat bekom was nie.

8.2.3 Enige lid wat geskors is, moet deur die Genootskap skriftelik daarvan in kennis gestel word binne drie dae na die datum waarop die besluit met betrekking tot sy uitsetting goedgekeur is.

8.2.4 Na sodanige skorsing van 'n lid mag die Raad opdrag aan die Sekretaris gee om sy naam uit die Kuddeboek en enige ander registers of verslae van die Genootskap te verwyder en by die Vereniging aansoek doen vir die kansellering van alle aantekeninge en/of registrasie ten opsigte van diere wat deur die geskorste lid geteel is en ten tyde van sy skorsing in sy besit was. Die Raad mag verder van die geskorste lid verlang om onverwyld alle aantekening- of registrasiesertifikate ten opsigte van perde wat ten tyde van sy skorsing in sy besit was, aan die Genootskap te oorhandig en na sodanige datum sal geen perde deur hom geteel, aangeteken of geregistreer of oorgedra word nie; geen geboortekennisgewings van hom ontvang sal aanvaar word nie en hy sal dienooreenkomstig in kennis gestel word.

8.2.5 Enige lid wat geskors word sal alle gelde deur hom aan die Genootskap verskuldig ten volle betaal en al sy verpligtinge nakom ten opsigte van aantekeninge en/of registrasies en oordragte of enige ander verpligtinge met betrekking tot sy lidmaatskap.

8.2.6 Enige persoon wat as lid van die Genootskap geskors word bly aanspreeklik vir alle ledegeld en gelde deur hom verskuldig aan die Genootskap ten tyde van sy skorsing.

## **8.3 OPHEFFING VAN STEMREG**

8.3.1 Enige lid, uitgesonderd lede in Klousule 4.2.2, wat vir 'n termyn soos wat die Raad van tyd tot tyd mag bepaal geen diere in sy naam laat aanteken of registreer het nie of wat nie aangetekende of geregistreerde diere gedurende sodanige tydperk aangekoop het waarvan die oordragte in sy naam geregistreer is nie, sal sy stemreg waarna in Klousule 6(b) verwys word, verbeur.





- 8.3.2 Die stemreg van geen lid sal opgehef word mits hy nie ten minste 30 dae voor die vergadering waarop sodanige opheffing in werking sal tree daarvan skriftelik deur die Sekretaris in kennis gestel is nie.
- 8.3.3 Sodanige opheffing van stemreg van 'n lid sal van krag bly totdat hy weer perde laat aanteken of registreer waarna die opheffing van sy stemreg onmiddellik beëindig sal word sonder dat enige kennisgewing te dien effekte aan hom gegee moet word.
- 8.3.4 Die opheffing van stemreg op die hierin vermelde wyse sal geensins die ander regte en/of verpligtinge van lidmaatskap affekteer nie.

## **9. HERAANSLUITING VAN LEDE**

Enige persoon wat opgehou het om lid van die Genootskap te wees, mag weer vir lidmaatskap in aanmerking kom ooreenkomstig die bepalings van Klousule 4.4 en nadat alle agterstallige skulde vereffen is.

## **10. VERKIESING VAN DIE RAAD EN UITVOERENDE KOMITEE**

- 10.1 Die belange van die Genootskap sal beheer en bestuur word deur 'n Raad wat uit die volgende nege lede sal bestaan en wat ooreenkomstig Klousule 10.3 jaarliks tydens die Algemene Jaarvergadering verkies word:
- (a) 'n President;
  - (b) 'n Vice-President; en
  - (c) sewe (7) lede.
- 10.2 Slegs persone wat reeds 'n minimum van twee jaar lede van die Genootskap was, is tot die Raad verkiesbaar.
- 10.3 Die metode van verkiesing sal as volg wees:
- (a) Verkiesing sal per geslote stembrief geskied. Sodanige stembrief sal geen nommer en/of handtekening bevat om die identiteit van die kieser te openbaar nie.
  - (b) Lede op hierdie wyse verkies sal die amp beklee tot die eerste Algemene Jaarvergadering na hul verkiesing wanneer drie lede deur die lot aangewys, sal uittree. Gedurende die tweede Algemene Jaarvergadering na verkiesing, sal drie uit die ses lede wat die langste op die Raad is, deur die lot aangewys, uittree, en daarna by elke Algemene Jaarvergadering sal die drie lede wat die langste die amp beklee het, die amp neerlê.
  - (c) Alle uittredende Raadslede is herverkiesbaar en beklee hul amp vir drie jaar.
  - (d) Na verkiesing van elke nuwe Raad sal die Algemene Jaarvergadering 'n President en Vice-President deur middel van geslote stembriefies vanuit die geleedere van die nuut verkose Raad kies, wat die onderskeie ampte vir 'n tydperk van een jaar sal beklee.
  - (e) Geen persoon mag die amp van President vir langer as drie jaar agtereenvolgend beklee nie, maar sal egter een jaar na verstryking van sodanige tydperk weer herverkiesbaar wees.
- 10.4 Indien 'n lid van die Raad te sterwe kom, bedank, ophou om lid van die Genootskap te wees of sy amp verbeur ingevolge Klousule 10.6, kan die Raad 'n ander lid van die Genootskap aanwys as sy plaasvervanger met volle magte vir die res van sy dienstermyn. Die Raad sal as behoorlik gekonstitueer beskou word en sal voortgaan om al die magte wat aan hom opgedra is uit te voer nieteenstaande enige vakatures wat daarin mag ontstaan.
- 10.5 In die geval waar die amp van President of Vice-President vakant raak voor die verstryking van die tydperk waarvoor hy tot die Raad verkies is, moet die Raad by sy daaropvolgende vergadering per geslote stembriefies persone uit sy geleedere nomineer en een verkies om die vakature vir die onverstreke tydperk te vul.
- 10.6 Lede van die Raad wat minder as 75% van vergaderings van die Raad bywoon kan hul amp verbeur.
- 10.7 Benewens die nege verkose lede van die Raad sal daar ook die volgende persone wees wat op die Raad dien in 'n adviserende hoedanigheid, maar sonder stemreg:
- (a) 'n beampte aangestel deur die Minister ooreenkomstig die bepalings van die Wet; en



- (b) die Sekretaris wat alle vergaderings van die Genootskap sal bywoon en die reg het om aan besprekings deel te neem, maar egter nie stemreg sal hê nie.
- 10.8 Die Uitvoerende Komitee van die Raad, wat magte sal beklee soos van tyd tot tyd deur die Raad bepaal, kan bestaan uit die President, Vice-President en twee lede wat jaarliks deur die Raad verkies word. Alle verrigtinge of besluite van die Uitvoerende Komitee moet goedgekeur word op die daaropvolgende Raadsvergadering. 'n Alternatiewe interne kommunikasieplatform tussen Raadslede soos deur die Raad onderling ooreen gekom, kan ook gebruik word vir besprekings, besluitneming en stemming tussen vergaderings.

## **11. MAGTE EN PLIGTE VAN DIE RAAD**

Die Raad het, onderworpe aan die bepalings van die Grondwet en die besluit van die Genootskap soos van tyd tot tyd geneem word, die mag om sodanig op te tree as wat in belang van die Genootskap is, of vir die bevordering en volvoering van sy doelstellings wat nodig of wenslik geag mag word. In besonder het die Raad die mag om:

- 11.1 betaling van lenings op enige wyse te sekureer, insluitende die verhipotekering of verpanding van goed, en sonder om afbreuk te doen aan die algemeenheid daarvan, in besonder deur die uitreiking van die soort skuldbrief of skuldbriefeffekte, met of sonder sekuriteit;
- 11.2 geld aan enige persoon of maatskappy te leen;
- 11.3 vrywaring en waarborge en borgstelling aan te gaan en betaling daarkragtens op enige wyse te sekureer;
- 11.4 donasies of skenkings te maak;
- 11.5 'n trust te onderneem en uit te voer;
- 11.6 gratifikasies en pensioene te betaal en pensioenskemas en ander aansporingskemas ten opsigte van sy ampsdraers en werknemers tot stand te bring;
- 11.7 onderhewig aan die bepalings van Klousule 7 die ledegelde of verpligtinge van lede van tyd tot tyd te wysig of aan te pas en om enige bykomende gelde en verpligtinge voor te skryf soos nodig geag mag word;
- 11.8 een of meer bankrekenings namens die Genootskap te open en enige, tjek, elektroniese banktransaksies of ander verhandelbare dokument wat op sake van die Genootskap betrekking het te trek, te aanvaar, te endosseer, aan te gaan of uit te voer;
- 11.9 geboue, grond, goedere, roerende bates en besittings te koop, te huur, op verband te neem of vir die Genootskap aan te skaf; om roerende goedere of vaste eiendom van die Genootskap te verkoop, te verpand, te verhuur, te verneem of andersins daarvan ontslae te raak en die vergoeding daaruit verkry op so 'n wyse aan te wend as wat tot die grootste voordeel van die Genootskap gereken mag word;
- 11.10 enige gelde wat nie vir die onmiddellike behoeftes van die Genootskap nodig is nie, te belê of op enige ander wyse te behartig teen sodanige sekuriteite en op sodanige voorwaardes soos die Raad mag goedgevind en van tyd tot tyd enige sodanige beleggings te verander of te onttrek;
- 11.11 al die koste en rekenings met betrekking tot die administrasie en bestuur van die Genootskap te betaal;
- 11.12 gelde, donasies en ander skulde en fondse in te samel en te ontvang en dit tot voordeel van die Genootskap en/of tot bevordering van die ras aan te wend;
- 11.13 op sekuriteit van enige eiendom van die Genootskap geld vir die Genootskap te leen;
- 11.14 ooreenkomstig Klousule 7.3 te weier om inspeksie-, aantekening-, registrasie- en ander werk vir lede te doen indien hulle uitstaande skuld by die Genootskap het;
- 11.15 algemene vergaderings van die Genootskap te belê, of na aanleiding van 'n spesiale versoek daartoe wat volgens die bepalings van die Grondwet gerig is, of andersins indien dit noodsaaklik geag word;
- 11.16 na goeë dunske sodanige ouditeure, prokureurs of ander regsvertegenwoordigers, agente, ampsdraers of amptenare of ander werknemers permanent, tydelik of met die oog op spesiale dienste aan te stel, te ontslaan, of te skors; om hul magte en pligte te bepaal, hul vergoeding en diensvoorwaardes

vas te stel en om sodanige voorsorg te tref vir die behoorlike uitvoering van hul pligte, as wat in besondere gevalle raadsaam geag mag word;

- 11.17 'n geding in te stel, te voer, te laat voer, te verdedig, of 'n skikking aan te gaan ten opsigte van enige geregtelike stappe deur of teen die Genootskap of teen enige van sy ampsdraers of amptenare of ander werknemers in verband met die aangeleenthede van die Genootskap; en om enige skulde wat betaalbaar is te verminder, of uitstel te verleen vir die afbetaling daarvan of die voldoening aan enige eise of aanskrywing deur of teen die Genootskap;
- 11.18 Enige skulde wat betaalbaar is te verminder, of uitstel te verleen vir die afbetaling daarvan of die voldoening aan enige eise of aanskrywing deur of teen die Genootskap;
- 11.19 kontrakte buite Suid-Afrika aan te gaan en kontrakte, aktes en dokumente in 'n vreemde land te verkry;
- 11.20 inspekteurs aan te stel om diere wat vir aantekening of registrasie aangebied is, te keur en vir die doel van enige ander werksaamhede waarvoor lede van die Genootskap die dienste van inspekteurs mag verlang en om aan sodanige inspekteur opdragte te gee en magte te verleen met betrekking tot hul pligte om te verseker dat die doelstellings van die Genootskap uitgevoer word, of om hulle te ontslaan;
- 11.21 opdrag te gee aan inspekteurs en/of ander amptenare van die Genootskap om ondersoek in te stel na gevalle waar daar nie behoorlik rekords gehou word nie of waar daar twyfel mag ontstaan met betrekking tot die identiteit van 'n diere en om sodanige stappe te neem soos in die belang van die Genootskap wenslik geag mag word;
- 11.22 die dienste van enige persoon of lid van die Genootskap te koöpteer en om subkomitees te benoem op sodanige voorwaardes en sodanige magte aan hul te verleen as wat van tyd tot tyd wenslik geag mag word. Die President en Vise-President van die Genootskap is *ex officio* lede van alle subkomitees met alle regte en voorregte. Addisionele lede mag op die Raad koöpteer word, maar sulke gekoöpteerde lede sal nie stemreg op die Raad hê nie;
- 11.23 sodanige reëls en voorwaardes op te stel met betrekking tot die kwalifikasies en benoeming van beoordelaars van die ras as wat nodig geag mag word, met dien verstande dat geen persoon as beoordelaar van die ras aangestel sal word alvorens hy voldoen aan sodanige vereistes as wat deur die Raad bepaal mag word nie. Verder om van tyd tot tyd die paneel van beoordelaars in heroorweging te neem en om daaruit sodanige name te verwyder as wat nodig geag mag word;
- 11.24 'n sisteem van beoordeling en keuring ten opsigte van inspeksie van diere in te stel en om reëls, voorwaardes, en terme aangaande sodanige inspeksies, en met betrekking tot keuring te formuleer, met dien verstande dat wanneer die Raad enige sodanige reëls herroep of op enige ander wyse verander het, sodanige reëls by die eersvolgende algemene vergadering van die Genootskap vir die inligting van sodanige vergadering voorgelê moet word;
- 11.25 verkope van diere te organiseer en te bevorder, hetsy deur openbare veilings of uit die hand en om vir hierdie doel afslaers en agent aan te stel;
- 11.26 aan enige lid van die Raad of enige amptenaar of werknemer van die Genootskap verlot tot afwesigheid toe te staan vir enige tydperk en op sodanige voorwaardes as wat in elke geval bepaal mag word;
- 11.27 een of meer lede of amptenare aan te stel met die gesag om namens die Genootskap dokumente te onderteken, stukke en gegewens te ontvang, geregtelike stappe te doen, op te tree, 'n eis in te stel, of gedagvaar te word, sodat die sake van die Genootskap beter en gemakliker uitgevoer en afgehandel kan word;
- 11.28 verteenwoordiger/s ooreenkomstig Klousule 16 op die Algemene Jaarvergadering van die Vereniging aan te stel en om 'n persoon of persone te benoem om die Genootskap op enige komitee, liggaam of organisasie te verteenwoordig;
- 11.29 aansoeke om lidmaatskap te ontvang en te oorweeg en dit na eie oordeel te aanvaar of af te wys; om persone kragtens Klousule 4.2.2 as Lewenslange-erelede te nomineer en om Spesiale Erelede kragtens Klousule 4.2.3 te verkies;
- 11.30 reëls en regulasies met betrekking tot die beheer van sake en die uitvoer van die doelstellings van die Genootskap op te stel, te wysig of op te hef;



- 11.31 ooreenkomstig Klousule 8 die lidmaatskap van enige persoon te beëindig;
- 11.32 sodanige strawwe of boetes op te lê of af te dwing as wat van tyd tot tyd vir lede van die Genootskap bepaal mag word vir die oortreding of skending van die Grondwet, reëls en regulasies van die Genootskap;
- 11.33 ondersoek in te stel na geskille wat uit die toepassing van die Grondwet mag ontstaan en om uitsluitel daaromtrent te gee;
- 11.34 enige bylae wat by die Grondwet aangeheg is, te verander of te wysig soos van tyd tot tyd nodig geag mag word;
- 11.35 'n Standaard van voortreflikheid op te stel en minimum vereistes en ander standaarde neer te lê waarvolgens:
  - (a) diere deur inspekteurs geïnspekteer word met die oog op aantekening of registrasie; en
  - (b) onderworpe aan die bepalings van die Wet, aansoeke vir die in- en uitvoer van diere, semen en embryo's oorweeg word;
- 11.36 van tyd tot tyd die Standaard van Voortreflikheid te hersien en aanbevelings aan die Algemene Jaarvergadering te maak; en
- 11.37 in die algemeen alles wat nodig is te doen met die oog op die welvaart van die Genootskap en die hantering van sy sake, altyd op voorwaarde dat enige stappe wat gedoen word of opdragte wat gegee word, nie teenstrydig sal wees met die bepalings van die Wet en die Grondwet nie.

## **12. VERGADERINGS**

### **12.1 VERGADERINGS VAN DIE UITVOERENDE KOMITEE**

Die Uitvoerende Komitee sal wanneer nodig vergader om die pligte wat deur die Raad aan hom opgedra is, uit te voer.

- 12.1.1 'n Raadslid mag die President verlof vra om persoonlik enige sake van belang voor die Uitvoerende Komitee te lê, op voorwaarde dat hy volledig op skrif stel wat die aard van die saak is. Indien die Voorsitter besluit dat die saak van genoegsame belang en dringendheid is, mag hy verlof verleen dat so 'n Raadslid die Uitvoerende Komiteevergadering bywoon om, met toestemming van die Komitee, die vergadering toe te spreek.
- 12.1.2 Indien die Voorsitter nie die saak van genoegsame belang ag nie mag hy verlof tot bywoning weier en indien hy so oordeel, toesien dat die aangeleentheid op die agenda geplaas word.

### **12.2 RAADSVERGADERINGS**

- 12.2.1 Die Raad sal op sodanige tyd en plek vergader as wat die President of in sy afwesigheid die Vise-President mag besluit, op voorwaarde dat minstens twee Raadsvergaderings gedurende elke finansiële jaar gehou sal word.
- 12.2.2 'n Spesiale Raadsvergadering:
  - (a) mag deur die President (of in sy afwesigheid deur die Vise-President) belê word, op sodanige tyd en plek as wat sodanige ampsbekleër mag besluit; of
  - (b) sal belê word op grond van 'n aansoek onderteken deur nie minder nie as vyf Raadslede waarin die redes vir die vergadering gemeld word. Sodanige aansoek moet aan die Sekretaris gerig word.
- 12.2.3 Skriftelike kennisgewing van die tyd, datum en plek van 'n voorgenome Raadsvergadering moet nie minder nie as 21 dae voor die vergadering sal plaasvind, deur die Sekretaris aan elke lid van die Raad gepos word.

### **12.3 ALGEMENE VERGADERINGS**

- 12.3.1 'n Algemene vergadering van die Genootskap wat bekend staan as die Algemene Jaarvergadering word een keer in 'n finansiële jaar gehou op so 'n tyd en plek as wat die Raad mag bepaal.



- 12.3.2 By so 'n Algemene Jaarvergadering sal die Raad sy jaarverslag aan die Genootskap voorlê, tesame met 'n behoorlike geouditeerde balansstaat en 'n verslag van die finansiële jaar waarop die verslag betrekking het. Sodanige Algemene Jaarvergadering moet gehou word:
- (a) nie later nie as ses maande na die einde van elke finansiële jaar van die Genootskap (einde Junie van elke jaar); en
  - (b) binne hoogstens 15 maande na die datum van die jongste voorafgaande Algemene Jaarvergadering van die Genootskap.
- 12.3.3 'n Spesiale Algemene Vergadering van die Genootskap mag te eniger tyd belê word deur-
- (a) die Raad; of
  - (b) die President (of in sy afwesigheid die Vise-President) en sal in laasge- noemde geval belê word op grond van 'n skriftelike aansoek daartoe, wat aan die Sekretaris gerig is en wat deur nie minder nie as tien lede van die Genootskap onderteken is. So 'naansoek moet die doelstellings van die vergadering duidelik uiteensit en gedurende sodanige vergadering mag slegs die gemelde sake behandel word.
- 12.3.4 'n Voorlopige kennisgewing van die tyd, datum en plek van 'n Algemene Jaar- vergadering moet minstens 60 dae voor die vergadering deur die Sekretaris aan elke lid gepos of in die amptelike mondstuk van die Genootskap gepubliseer word. Enige lid wat van plan is om enige saak by die Algemene Jaarvergadering vir bespreking voor te lê, moet die Sekretaris nie minder nie as 40 dae voor die vergadering, skriftelik daarvan in kennis stel.
- 12.3.5 'n Finale kennisgewing van die tyd, datum en plek waarop enige algemene vergade- ring gehou sal word, tesame met die agenda vir die vergadering, moet minstens 30 dae voor die vergadering aan elke lid van die Genootskap gepos word.
- 12.3.6 Daar sal geen besluit op 'n algemene vergadering geneem word tensy kennis daarvan op die agenda, wat tesame met die kennisgewing van vergadering aan lede gestuur is verskyn nie, of tensy so 'n vergadering met 'n twee-derde meerderheid van stemme, van lede wat teenwoordig en stemgeregtig is, besluit om enige saak wat nie spesifiek op die agenda is nie, te bespreek en daaroor te stem, ongeag die bepaling van Klousule 12.3.3(b).
- 12.3.7 Enige algemene vergadering mag verdaag word deur 'n twee-derde meerderheid- stem van die lede wat daarby teenwoordig is.
- 12.3.8 Vir die doel om besluite op 'n Algemene Jaarvergadering geneem, te herroep, word 'n twee-derde meerderheid op 'n algemene vergadering vereis.

#### **12.4 VOORSITTER BY VERGADERING**

Die President beklee die voorsitterstoel by alle vergaderings en indien hy afwesig is beklee die Vise-President die amp. Indien daar nie een van hierdie ampsdraers by 'n vergadering teenwoordig is nie, mag die lede wat teenwoordig is 'n ander lid verkies om by sodanige vergadering die voorsitterstoel te beklee en enige persoon wat op so 'n manier verkies is, sal met betrekking tot daardie vergadering oor die mag beskik om al die pligte van die President uit te voer.

#### **12.5 NEEM VAN BESLUIE**

Alle sake wat voor enige vergadering gelê word, tensy andersins voorsien word, moet besleg word deur die meerderheid van stemme van die lede wat by die vergadering teenwoordig is en stemgeregtig is. In die geval van 'n staking van stemme sal die persoon wat by daardie vergadering die voorsitterstoel inneem 'n beslissende stem naas sy gewone stem hê.

#### **12.6 METODE VAN STEMMING**

Onderworpe aan die bepalings van Klousule 10.3 sal stemming by alle vergaderings met die opsteek van hande geskied, tensy enige teenwoordige lid stemming per briefies verlang in welke geval stemming per geslote stembriefies sal geskied.



## **12.7 ONGELDIGHHEID VAN BESLUITE**

Geen saak wat behoorlik en grondwetlik op enige vergadering afgehandel is, kan ongeldig verklaar word slegs weens die feit dat enige lid geen kennisgewing kragtens die vereistes van die Grondwet ontvang het nie.

## **12.8 KWORUMS**

- 12.8.1 Vyftien van die lede van die Genootskap wat persoonlik teenwoordig is by die aanvang van enige algemene vergadering sal 'n kworum vorm vir so 'n vergadering.
- 12.8.2 Vyf Raadslede wat persoonlik teenwoordig is by enige Raadsvergadering en wat stemgeregtig is sal 'n kworum vorm vir so 'n Raadsvergadering.
- 12.8.3 Twee lede wat persoonlik teenwoordig is by enige Uitvoerende Komiteevergadering sal 'n kworum vorm vir sodanige Uitvoerende Komiteevergadering.
- 12.8.4 Indien daar by enige vergadering nie 'n kworum teenwoordig is nie, kan die vergadering verdaag tot 'n tyd (nie minder as sewe dae daarna) en plek wat deur die lede persoonlik teenwoordig bepaal word. Op so 'n uitgestelde vergadering vorm die teenwoordige lede wel 'n kworum, met dien verstande dat enige vergadering waar daar geen kworum is nie, maar waar die President of Vice-President teenwoordig is, vir 'n halfuur verdaag moet word waarna die lede wat dan teenwoordig is, 'n kworum vorm vir die afhandeling van sodanige sake (grondwetlike wysigings uitgesluit) as wat deur die lid wat die voorsitterstoel beklee, dringend mag verklaar. Sodanige verdaging vir 'n halfuur sal nie tot nadeel van die regte van die vergadering wees nie om nadat aandag aan die noodsaaklike aangeleenthede gegee is, te verdaag tot 'n tyd en plek soos hierin bepaal.

## **13. NOTULES NA VERGADERINGS**

- 13.1 'n Afskrif van die notules van alle Algemene Vergaderings sal aan elke lid van die Genootskap voorsien word. Afskrifte van die notules van Raadsvergaderings en Subkomiteevergaderings sal aan alle Raadslede voorsien word.
- 13.2 Die Notule van alle vergaderings geteken deur die President of 'n persoon wie die voorsitterstoel beklee gedurende die daaropvolgende vergadering, sal bewys wees daarvan dat alle verrigtinge behoorlik geskied het en dat alle verkiesings, aanstellings en besluite aanvaar gedurende sodanige vergadering, bindend en van krag is.

## **14. FINANSIËLE BEPALINGS**

- 14.1 Die Raad sal een of meer bankrekenings namens die Genootskap open, waarin alle gelde wat die Genootskap ookal mag ontvang, gedeponeer moet word.
- 14.2 Alle elektroniese betalings uit die fondse van die Genootskap word skriftelik deur die Sekretaris of 'n persoon wat deur die Raad daartoe aangestel is, goedgekeur ooreenkomstig Klousule 11.27: Op voorwaarde dat niks wat hierin vervat is die Raad sal verhoed om 'n kleinkasfonds in stand te hou en te beheer nie. Kontantonttrekkings word per tjek gedoen nadat goedkeuring verkry is en dit deur die persoon of persone soos deur die Raad aangestel, onderteken is. Gereelde en gewone maandelikse rekenings wat nie 'n bedrag wat deur die Raad bepaal is, oorskry nie, word elektronies gedoen.
- 14.3 Die Genootskap moet behoorlik rekeningboeke hou wat van tyd tot tyd maar nie minder nie as een keer per jaar deur 'n ouditeur wat deur die Algemene Jaarvergadering van die Genootskap daartoe aangestel is, geouditeer word en 'n behoorlik geouditeerde balansstaat en verslag van die finansies van die Genootskap soos op einde Junie van die finansiële jaar waarop die verslag betrekking het, soos uiteengesit in Klousule 12.3.2, moet aan die Algemene Jaarvergadering van die Genootskap voorgelê word.
- 14.4 Al die besittings van die Genootskap is gevestig in die Raad.



- 14.5 Die inkomste en besittings van die Genootskap, uit watter bron ookal ontvang, sal enkel en alleen aangewend word ter bevordering van die doelstellings van die Genootskap en geen deel daarvan sal direk of indirek as dividend of bonus of andersins betaal of oorgedra word aan enige persone wat te eniger tyd lede van die Genootskap is of was nie, op voorwaarde dat niks wat hierin vervat is die betaling in goeder trou aan enige werknemer of ander persoon vir dienste wat aan die Genootskap gelewer is, kan verhoed nie.
- 14.6 Indien daar na die beëindiging of ontbinding van die Genootskap en nadat al die skulde en verpligtinge nagekom is, enige eiendom oorbly, sal sodanige eiendom nie onder die lede van die Genootskap verdeel of aan hulle uitbetaal word nie, maar geskenk of oorgedra word aan sodanige ander instellings waarvan die doelstellings ooreenstem met dié van die Genootskap soos deur die meerderheid op 'n algemene vergadering van die Genootskap besluit.
- 14.7 Die finansiële jaar van die Genootskap neem 'naanvang op 1 Julie van elke jaar en sluit op die einde Junie van die daaropvolgende jaar.

## **15. LIDMAATSKAP VAN DIE VERENIGING EN AFFILIASIE**

Die Genootskap sal sy lidmaatskap van die Vereniging in stand hou op die voorwaardes soos deur die Vereniging bepaal. Verder kan die Genootskap ook met enige vereniging, genootskap of organisasie waarvan die doelstellings met dié van die Genootskap ooreenstem affilieer of inkorporeer op voorwaarde dat so 'n besluit goedgekeur word deur minstens twee-derdes van die stemgeregtigde lede wat by enige Algemene Vergadering van die Genootskap persoonlik teenwoordig is en stem.

## **16. VERKIESING VAN VERTEENWOORDIGER/S TOT DIE ALGEMENE JAARVERGADERING VAN DIE VERENIGING**

Ooreenkomstig Klousule 17.28 moet die Raad 'n verteenwoordiger of verteenwoordigers tot die Algemene Jaarvergadering van die Vereniging uit Aktiewe Gewone Lede of Lewenslange Erelede verkies.

## **17. GRONDWETLIKE WYSIGINGS**

- 17.1 Byvoegings tot, of wysigings aan die Klousules van die Grondwet mag slegs aangebring word deur 'n meerderheidsbesluit van nie minder nie as twee-derdes van die lede wat by 'n algemene vergadering van die Genootskap teenwoordig en stemgeregtig is en stem. Ook moet van die voorgestelde wysigings of byvoegings van die Grondwet, asook van die vergadering, skriftelik kennis gegee word aan elke lid van die Genootskap nie minder nie as 21 dae voor die vergadering.
- 17.2 Sodanige byvoeging tot, of wysiging aan die Klousules van die Grondwet wat goedgekeur is soos in Klousule 17.1 hiervan beskryf, moet binne 30 dae nadat die wysiging aangebring is aan die Vereniging voorgelê word en dit sal 90 dae nadat dit aldus voorgelê is, in werking tree: Met dien verstande dat indien die Vereniging van mening is dat die byvoeging en wysiging onbestaanbaar is met die bepalings van enige toepaslike wetgewing en/of die Konstitusie van die Vereniging sal die Genootskap daarvan in kennis gestel word waarna sodanige byvoeging en wysiging van nul en gener waarde sal word.
- 17.3 Byvoegings tot, en wysigings aan die Verordeninge in die Grondwet vervat mag eenparig deur die volle Raad gewysig word: Met dien verstande dat sodanige byvoegings tot, of wysigings aan die Verordeninge in die Grondwet vervat nie strydig mag wees met die bepalings van die Konstitusie van die Vereniging nie.



**18. KANTOOR VAN DIE GENOOTSKAP**

Die kantoor van die Genootskap sal op 'n plek wees soos wat die Raad mag bepaal.

**19. OUTENTIEKE LESING VAN HIERDIE GRONDWET**

Aangesien hierdie Grondwet en die bygaande Bylaes in Afrikaans opgestel, ingedien en oorweeg is, word die Afrikaanse weergawe as outentiek beskou.

